

ներ էին, որոնց շէր հանդուրժել հին եկեղեցին և վտարել ու բանտարկել էր: Դիոսկորոսը համարձակ կերպով առաջ էր քաշում դրանց, բայց Հայաստանի հոգևորականությունը ինչպես Անիում, այնպես էլ գավառներում խիստ ուժեղ էր և շէր ընդունում ոչ միայն կաթողիկոսի, այլև թագավորի ու իշխանների կարգադրությունները: Դեռ ավելին, հոգևորականությունը նզովեց և եկեղեցուց դուրս հայտարարեց թագավորին և իշխաններին: Այդ աշխարհիկ ու հոգևոր ֆեոդալների ներքին պայքարի մեջ հաղթող դուրս եկավ հոգևորականությունը: Եկեղեցին հաղթեց և այնուհետև տեսնում ենք, որ նա ավելի մեծ ուժ հանդիսացավ մանավանդ 11-րդ դարից հետո, երբ Հայաստանում հետզհետե տեղական թագավորությունները ոչնչացան և երկիրն անցավ օտար տիրապետությունների տակ:

Դիոսկորոսը, վերադառնալով Սանահին, մինչև իր մահն էլ իրեն հայրապետ էր համարում, և նրա անունով Սանահնում պահպանված երկու արձանագրությունները կաթողիկոսական հրամանի բնույթ ունեն: Այդ արձանագրություններից մեկը պատկանում է 1061 թվականին, որով իշխանաց իշխան Շապուհիկը մի գյուղ է գնել և նվիրել Սանահնին (արձ. 105), իսկ մյուսը 1063 թվականն է կրում և վերաբերում է ս. Գրիգոր բողոքական եկեղեցու և գրատան շինության՝ Հրանուշ թագուհու հրամանով (արձ. 179):

Հենց այն, որ Դիոսկորոսի օրով է շինվել Սանահնի գրատունը և ծառայել է գրքերի և թանկարժեք առարկաների պահպանման, ցույց է տալիս նրա վերաբերմունքը զեսլի գիրքն ու արվեստի նմուշները: Ինքնին հասկանալի է, որ Դիոսկորոսի նախաձեռնությամբ ու ղեկավարությամբ է Հրանուշ թագուհին կառուցել տվել գրադարանի և բոլորակ եկեղեցու գողտրիկ շենքերը:

Չնայած այն բանին, որ Դիոսկորոսը իբրև կաթողիկոս մերժվեց և նրա քաղաքականությունը դատապարտվեց հայոց եկեղեցու կողմից, բայց և այնպես մեր հին մատենագիրները նրան մեծարել են Մեծն Դիոսկորոս, Մեծ հոնտորն Դիոսկորոս (Մատթեոս Ուռհայեցի), այլ սուրբ և առաքինի (Վարդան

Վարդապետ) բառերով: Ուռհայեցին, թվելով 11-րդ դարի հայոց լուսավոր վարդապետներին՝ Անանիա և Գրիգոր Նարեկացիների, Կոզեռնի, Լաստիվերտցու և մի քանի ուրիշների կողքին, նշում է նաև Դիոսկորոս Սանահնեցու անունը:

Դիոսկորոսը ոչ միայն մատենագրան է շինել Սանահնում, այլև վանքի համար ձեռագրեր է արտագրել տվել: «Արարատ» ամսագրի 1901 թվականի 275 էջում նր. Ս. ստորագրությամբ լույս տեսած հոդվածի հեղինակը քաղվածորեն մեջ է բերել էջմիածնի ձեռագրերի հիշատակարանները Դիոսկորոսի մասին, որոնցից մեկի մեջ ասված է՝

«Ընկալեալ զհրաման տեառն իմոյ հօր Դիոսկորոսի և հոգելիր վարդապետի՝ Սանահնի սուրբ ուխտի առաջնորդի, զոր յոյժ ըղձիւ և սիրական բաղձանօք հայցեալ պահանջեցեր ի մէջը, վասն բացայայտութեան տէրունեան բանից կենսարևր աւետարանին՝ համառօտաբար շարագրել զսրբոց վարդապետացն վերաճառութիւն, որք տեսութեամբ հոգւոյն, բացափայլեցին ի մեզ զլոյս գիտութեան և զծածկեալ խորհուրդ հոգւոյն, որ ի բազմաց զանխարար թաքչիւր...»¹:

Դիոսկորոսը ոչ միայն ինքն է եղել գրասեր և զարկ է տվել ձեռագրերի բազմացման, այլև նա Սանահնի վանքում հավաքել էր ու աճեցրել միջնադարյան գիտնականների մի ամբողջ խումբ, որոնց մեջ ամենից շատ աչքի էին ընկնում Անանիա Սաւահնեցին և Հակոբոս Սաւահնեցին կամ Քարաբեցին:

Դիոսկորոսի առաջնորդության ժամանակ մեծ գիտնականի և փիլիսոփայի անուն էր վաստակել Սանահնի վանքի միաբան Անանիան: Նրա մասին Կիրակոս Գանձակեցին գրում է.

«Իսկ յԱրևելս արք անուանիք և գիտնականք լուսատրիչք եկեղեցույ՝ Անանիա վարդապետ ի Սանահնին, յաւուրս Դիոսկորոսի, այլ մտաւոր և հանձարեղ, գիտող տոմարական արհեստի, և աստուածային գրոց մեկնող»:

Այնուհետև Գանձակեցին գրում է, որ Անանիան Պետրոս Գետադարձի հրամանով գրել է Պողոս Առաքյալի չորեքտասան թղ-

¹ Նր. Ս. Հաղրատ և Սանահնի վանքերը, «Արարատ», 1901, մայիս—հունիս, էջ 275: Նույնը՝ Գարեգին Ա. կաթողիկոս, Յիշատակարանք ձեռագրաց, հատ. Ա, էջք 221—222, նաև էջ 1043: